

四庫全書

集部

欽定四庫全書

集部

皇清文頴卷

三十九
四十

詳校官檢討臣朱依旻

主事銜臣徐以坤覆勘

覆校官中書臣田尹衡

校對官助教臣吳省蘭

謄錄貢生臣袁瑩

欽定四庫全書

皇清文頴卷三十九

賦

藉田賦

有序

和親王弘晈

臣聞禮經考索云國以民為本民以食為天故虞
舜命后稷曰播時百穀周公陳無逸曰先知稼穡
之艱難誠所以厚民生固國本也昔漢文帝詔賜
天下田租之半議賑議貸黎民乂安治最近古唐

太宗親祭先農躬御耒耜當時天下無事五穀豐登百姓和樂幾至刑措欽惟我

皇上重農貴粟子惠元元深仁同天至德匝地

御極之二年甲辰春仲

躬親耜田率三公九卿秉耒而耕至誠歲事嗣是耕耜之禮每歲舉行至勤且恪用以迓

天貺享

祖考阜人民典鉅慶隆豐年屢兆六府著修和之媿萬

方興盈億之歌唐虞三代之盛未有加於此也謹
拜手稽首繕賦以獻其詞曰

繫稼穡之匪懈兮食乃萬民之天惟我

皇之重農兮稽鉅典於前編敬塗盛而飭御耦兮用作
式於八埏乃祇事於九宮之位兮遂

躬耕於千畝之田祥光燦於膏壤兮瑞氣發乎郊鄴萬
姓歡傳兮如百川之朝海千官布列兮等衆星之麗天
懿哉我

皇勤思田功諏吉期兮幸東陸齋三日兮告神農內外
兮清謐上下兮肅雍是日也水漏聲殘東方欲曉南面
凝旒御爐香裊鸞仗兮具陳景鐘兮徐考俄而閭闔啟
寶扇揚六轡齊舉八鸞鳴鏘披綠野兮條風和矚青郊
兮嘉卉芳惟宮啟兮春日麗黛耜具兮稼器詳執洪縻
兮在手御紺轅兮游場四顧兮溝塍砥平三推兮土脈
蘇昌若夫公卿大夫進耕以次或五或九祇肅罔肆庶
人終畝勞酒以賜胥上下以致恭遵禮經而歲事於是

金鞭方輟玉輅遂旋雨
庶纖以清路風縹緲而散烟
侍從偕來睹

天顏之有喜馨香上達卜瑞兆於豐年
統神人而胥悅慶福祉之交駢
緬夫后稷播種夏禹躬耕取諸豫而順
動應乎乾而時行書傳乃粒之義詩有
生民之賡仰惟我

皇敬誠充盡耒耜

躬親降福孔穰萃九有之歡心展

一人之孝享洵咸五以登三與天參而地兩數耕藉田
兮綏萬屢豐匪且有且兮樂利咸仰又從而獻頌曰我
皇重農弗自暇逸

御藉躬耕身先為率東作西成獲之恡恡晉獻宗廟享
於克一

上元觀燈賦

以時和年豐萬方同樂為韻

和親王弘晝

繫陽律之乍轉瞻斗柄之初移勃佳氣之鬱蔥正陽春
之屆期解初寒於百室扇條風而和熙快媚景之始陳
惟桃李之先知矧上元之佳節列燈樹於九達布風光
之妍麗咸流翫而忘疲爾乃明昭上帝受福則那雙莖
九穗珍祉駢羅慶民安而物阜悉巷舞而途歌時清兮
太平有象春融兮樂事孔多羅勝新裁人人綵綯鬧蛾

爭要處處肩摩忘箭移於玉漏愛蠟艷於銅荷維時明
月上夜景妍士女集車馬聯搏搏繹繹轟轟闐闐鐵市
銅街闐銀花之璀璨紅樓翠館映火樹以嬾娟簫鼓溢
昇平之響黔黎遊豐樂之年此固合九州而一軌統四
海而皆然者也至若

皇都佳景更為隆豐春先得於萬國恩早沛於九重比
戶受盈寧之錫連閭揚和樂之風故應節而春燈盛祈
年而勝賞同九枝延追古之佳號百葉翻炫今之巧工

或團圞兮似月或蜿蜒兮猶龍撒魚鑰於五夜兮天街
蕩蕩渡星橋於九陌兮人影匆匆若夫居尊臨卑執一
御萬玉燭調兮泰階平東風至兮韶景換人無往兮不
和民有樂兮爭獻張綵架於六宮炯炬輝於三殿鰲山
對峙龍蠟烜其歲蕤鳳閣層開星毬布其燦爛攄愉悅
於

宸襟又萬方之所同願夫其夜明似晝月照如霜萬戶
千門羃祥烟之暎藹五光十色閃鶴醵之熒煌畫檻兮

金蟲墜影紗籠兮蠟穗吹香錦繡紛敷儼勝萬花綺谷
笙璫錯奏宛齊瀛海仙鄉夫豈猶人世之可擬而塵埃
之足方也哉然而致斯盛也

一人垂拱九有大同萬物並育百穀屢豐致黎庶於康
阜萃民氣於和雍宜乎登春臺而胥悅同民樂於無窮
爰頌我

皇受天百祿嘉符迭臻金甌永卜慶天地之長春敷陽
和於百族年復年兮化日舒歲復歲兮兆姓樂睹良宵

與勝事快風熙而景淑歡呼起舞燃長明不盡之燈就
日瞻雲申

萬壽無疆之祝

學問至芻蕘賦

和親王弘晝

為學在乎下問審問貴乎虛心不下問而終成自棄非
虛心而集益不深遠覽遐搜惜寸陰於暇日廣咨博採
彙碩論於冲襟然後獻可替否作礪為霖彼詢於芻蕘
之訓可謂昭往古而耀來今矣原夫日新謂德多識是
貴自用則小矜滿宜汰不臨深以為高敢居約而為泰
迹其過乎自卑正其所以成大是以有而不居謙而不
忤盖未有自以為是而不受害者粵稽先哲博觀往訓

堯稱克讓舜推好問大禹傳昌言之拜發於至誠孔子
當聞過之時引以自幸夫豈徒高已卑人守一身之獨
學眇聞寡見致四方之令聞也哉爾乃並觀兼聽推誠
布公乃明四目聿達四聰謨猷日陳乎殿陛咨度下逮
於蒿蓬於是朝廷之上藪澤之中靡不進讜論竭愚忠
小夫獻一得之善太史陳四方之風詎止邁乞言於憲
老而納明諫於瞽矇於是學既得宗問惟務廣內不懈
兮道積而修來外多聞兮用中而酌兩纖毫不棄如大

海之納細流片善必收等泰山之容土壤敢言之路日
開虛受之衷內朗此

一人所以集慶而為臣民之所共仰者乎

荔枝賦

和親王弘晝

原夫大宛蒲萄上林櫻栗平陸甘瓜江陵紫橘玉井之
雪藕欺霜洛陽之朱櫻耀日鍾山之李大如瓶信都之
棗甜於蜜徵嘉果於羣芳咸應時而垂實乃有林檎為
兄石榴為弟稟乎炎精依乎火帝殼染丹砂衣裁錦悅
角昂見而綻靈葩雲日鏡而流火齊枝懸萬顆等瓔珞
之紛垂霞麗千房儼珊瑚之交綴繁生閩粵之鄉著義
渝涪之際肇嘉名曰荔枝非凡果之可媲美其為色也

或稱陳紫或命藍紅始雕青玉旋鏤丹銅瓊膏兮內孕絳羅兮外蒙赤罽初收脫晶丸於掌上朱囊乍解卸冰繭於盤中宜乎領狀元之號而膺一品之封若其為香也貫膚膜徹表裏氤氲可尋掩冉難擬紀江綠之秘芬傳宋香之旖旎剖殘蘄顚溢芳靄而襲人劈破冰肌散清芬而染指此薰艾納者不足方而含鷄舌者庶可比至其為味也談香心醉數種涎滋津寒兮似雪膚膩兮如脂沾唇而甘流僊醴入齒而冷沁華池小核中含快

嚼丁香之實瑩瓢外朗潤同瓊島之芝若夫厥種攸分
品題獨絕龍牙鳳爪之殊雙蒂側生之別楓亭兮自昔
稱奇閩嶠兮於今為烈蔡中郎之譜譽以無雙白香山
之圖誇為第一固宜人人同嗜處處爭傳方之絳雪擬
以神僊詩誦髯蘇狂情饕餮賦成王逸麗句羊綿此紀
芳名於千古而擅嘉實於八埏者也方今

聖澤無方

神功及遠極無外之要荒亦盡歸於圖版藉方物以輸

將詎辭勞於往返

聖心祇惕兮異物弗珍
臣子敬恭兮歲供恐晚
頌玉府兮

殊錫九天
褱黃帕兮承

恩上苑
咽天漿而飲

德孔深
謹獻賦而丹誠藉展
爰為之歌曰嘉實之生依
此芳樹嘉實之來致自

王路欣沐

賜於

九重得分甘於瑤圃看歲獻於炎方慶蒸黎之永附

皇太后萬壽無疆賦有序以萬壽無疆賦為韻

誠隱郡王允祉

皇上御極之三十九載恭遇

皇太后萬壽花甲一周臣祉備位屏藩得颺言

頌祝伏惟

聖母凝庥錫嘏永萬年之厯

睿思弘孝尊親垂百代之光

奉玉食以含飴承露掌開列綰紛之環珮

被山龍而戲綵釣天樂奏來絡繹之車書添籌算於
未央薦兕觥於長樂治道式彰乎

孝德

慈顏並永於坤維率土咸歡普天胥慶臣祉學慚沛獻

欲將介福之詞才謝陳思敢進母儀之頌惟願流

霞絳雪佐玉膳之瓊漿朱草醴泉効椒宮之靈瑞

斑龍捧馭萃松喬期羨而偕稱五福之觴青鳥啣

書合方壺蓬瀛而共貢九如之什臣不勝夫歡忭

愧無能於贊揚謹抒葵忱聊伸嵩祝謹作賦以

獻賦曰

維

聖世之清寧萃禎祥而疊獻既治化之旁敷徵皇極之
克建合大順以致尊親集振古之洪禧躬盛德以崇

聖母立興朝之彞憲我

國家車書同軌大一統以為家

聖祖母六甲甫週協二儀之永健天人咸應以休徵子

孫得伸其至願貢獻踰山海以梯航頌揚極臣民之億萬伏覩我

皇上純孝性成聖德天授定省晨昏恭勤左右怡

慈顏於椒闈承

歡心於靈囿奉鸞輿莅湯沐之里旃裘毳帳貢琛而獻
賁者駢闐導鳳舸臨吳越之邦白叟黃童巷祝而衢歌
者輻輳命駕則豐隆灑途御舟則天吳肅候神祇因
孝德以効靈山川願嵩呼而獻壽恭惟

皇太后鴻仁溥被渥澤涵濡周藉姜興開天而佐

聖祖任惟妣繼配地以大皇圖茲執徐之紀歲值花甲
之方逾玉殿風和仰卿雲之似蓋金莖日麗浥甘露以
如珠

皇情幸

母后之安康而喜慰

聖懷極家人之禮數以歡娛人親其親人子其子已合
四海以成

一人之孝人知奉親人知克子又即

一人以示百代之模實前古之稀覯允近今之所無於是南極耀景星光神鳥集瑞鳳翔蓬蒲自扇棠英呈祥蓋六合含齒戴髮之倫盡荷

推恩之濺渥八極翺動蠕生之屬同涵

錫類之汪洋邇煦育之

洪慈已共黃輿之罔外合羣情為大慶自同

坤德之無疆乃若孟冬屆節乾風初度萬物凝成歲華

貞固方初月之生明喜昌期之遘遇大典合萬國之歡
聖孝誠五十而慕

龍文煥彩唱天長地永之詞

螭陛歡騰上日升月恒之句儒林何幸得珥筆以颺言
藩列雖微亦趨庭而學步欣遇

聖明之世欲紀盛而無能敢役簪紱之倫抒微誠而獻
賦

萬壽賦 以一人有慶萬福來同為韻

誠隱郡王允祉

惟

昊蒼之無私佑元后之建極六合待其範圍五福由之
敷錫故瑤光華渚受命凝祥日角電樞開天叶吉然稱
祝莫尚陶唐祈年獨侈周歷自今以較前徽

聖皇實為首出蓋久道爰觀乎化成純嘏畢集於盛德
今將賡天保定爾之篇請歷數壽考維祺之實我

國家自

太祖丕基締造至

太宗興圖式闢

世祖凝鼎命以維新

皇上則大顯承而正域質既擅其神靈學復傳乎精一
聖功乾健

聖德日新隆

兩宮之孝養肅

九廟之明裡光輝被乎四表懷柔遍於百神治本乎黃
唐虞夏道貫乎瀛洛關閩乃進石渠之彥天祿之臣闡
圖書之閭奧析謨典之真醇廣教思於宇內布講義於
成均且

宣諭而立訓俾化俗以興仁寰中順則海外來賓覆冒
丕周僉頌

右文天子聲教四訖咸尊

有道聖人至若

神武震乎八區

皇威赫乎九有，弧矢用而市不易肆，櫓槍銷而農不更畝。南服廓清，北藩稽首，遂使龍庭毳幕，隸留守之版圖；鼉窟鮫人，增海邦之戶口。擴中外以為家，合垓埏而在宥。

念殊域之傾誠，并憇懽於高厚

龍旗指瀚海之區，虎旅環陰山之阜。饒歌朱鷺，七萃同聲；旅振白狼，百僚拜手。遐邇同歡，梯航恐後。邁漢唐而

莫京越三五而誰偶猶以保泰在乎持盈勵精逾乎初政憫淮泗之其咨頻省方以申

命躬授平成之規永著河渠之令桑田無恙而允翕可期壁馬不捐而安瀾告慶且

勤昧爽以圖幾

闢明聰而廣聽

延訪下逮於芻蕘垂箴用勵夫諫諍岳牧閫帥俾述職以近

光守宰偏裨得伏蒲而仰

聖憐才則宏開使過之仁獎廉則立寄封疆之柄計典
不煩而吏自整肅軍政預飭而士皆果勁百工有允釐
之休庶績有咸熙之盛至若耕織早繪於

深宮惠澤必周於海甸雨暘未爽桑林之禱默修豐歉
未形常平之儲早辦關隴頒少府之朱提淮揚仰神倉
之白粳課額減而商竈均霑權稅寬而憊遷共勸宿逋
盡免累豁者數十州賜復頻聞歲蠲者數百萬且念深

於欽恤法詳於奏讞巽風掃地幽枉皆春解澤行天生
全無算刑不濫而幾措網雖寬而無玩爽鳩之秀於園
扉貫索星澄於碧漢此皆

德意浹乎肌膚豈史臣所能紀贊更有盛事足冠古今
鉅典永輝簡牘

巡狩則

定省無違遊豫而花萼必薦闕里之輪奐聿崇先儒之
遺裔畢錄勝國

親修禮敬之儀賢祠

特錫馨香之粟他如東藩請糴轉輸之艘舶聯翩北漠
望哺賑貸之車牛相續沮江平壤欣鼓腹者千村木葉
臨潢慶更生者萬族又若巴渝外徼溪洞殊俗皆百代
之所不臣千祀之所未服

詔書下而永戴

尊親驛使臨而願依覆育即今四十二載魏煥之規已
裕百千萬年清寧之福時則協洽紀歲姑洗律迴花明

瓊島柳拂金臺鶯歌玉樹燕舞瑤堦慶雲屯於六甲佳
氣統於三台瑞啟當年占為五龍七鳳歡同此日洽於
八埏九垓內則六宮瞻

黼座而上無疆之祝列藩隨

主器而貢

萬壽之杯外則勲臣世胄九棘三槐折衝干城之選鹽
梅舟楫之材八表之車書共集萬方之玉帛偕來海澨
山陬歡呼動地衢歌巷祝頌禱如雷則見夫南極輝於

丙位太乙耀於璿宮仙仗齊而龍墀濟濟鈞天奏而鼉鼓逢逢合宇宙愛戴之情結葱葱之瑞靄聚

天地太和之氣布習習之條風從此醴泉洋溢甘露沖融騶虞馴囿朱鳥棲桐物皆上瑞歲咏屢豐玉燭調而星躔式序金甌固而風俗皆同含哺者忘

帝力珥筆者紀時雍臣敢附九如於雅什繼三祝於華封謹稽首頓首奉觴以進曰

盛德鴻功覆載同符而莫並

大年寶歷乾坤共永於無窮

解愠阜財賦

平郡王福彭

君代天以理物聖出治而憲天至治行乎無事大化著
其誕宣傾者扶滯者出和氣薰蒸乎六宇求有獲欲有
遂休嘉翔洽乎九埏惠薰兮和暢氤氲兮聯縣萬民兮
雍動四野兮殷闡鑿井耕田帝力忘於何有崇墉比櫛
史官誌其有年緬勲華之上理符大造而無偏爾其時
屆中天

聖人在位輯瑞來同共球畢至卿雲兆其紉縵四表蒸

其光被煦煦乎大塊之噫氣既鼓物而無淒油油乎空
穴之娛人亦飲醇而如醉歌於塗舞於巷民十室而九
康積於野登於場禾一莖而六穗家無暑雨之咨戶有
珠玉之賜府修事治溥樂利於四民雲爛日華慶平成
乎天地皆斯風之煦嫗代君王而撫字若夫其出自谷
其来自南汎蘭如臭捲霧為嵐若浮若沈垂烟雲為噓
吸如升如降隨光景以沈涵木當之而擢秀草拂之而
成氎凍遇之而融融露值之而湛湛鬱者舒而憂者喜

何愠之難堪至於箕主簸揚物為解渙欣然枯蘇淵然
冰泮吹棘薪兮為凱宣橐籥兮非散從星好兮沛霖導
協氣兮去暵與與翼翼任滿載乎篝車穰穰芄芃溥盈
寧於里閭玉粒兮香浮珠圓兮白粲家安溫飽胥士女
而噢咻戶樂倉箱極千萬而無算珥筆而紀昇平皆斯
風所畢貫信乎列於六子導乎四時著人眇眇鼓物垂
垂理陰燠陽佐聖人之經緯迎休導嘏助氣化而敷施
綿綿兮金粟獵獵兮玉枝動物兮不暴宣氣兮咸宜合

四方為薰蒸成兩大之致用因八至以鼓盪識造物之
無私我

皇上至德動天休祥福物風聲遠播風教四訖宣仁布
義統庶類而甄陶禮備樂和胥群氛而除祲東極滄海
西抵流沙徧六合以攸同上及太清下及太寧盈兩間
而遐迩顧大化無外

聖心不居謂予一人順陰陽以調劑合二五為煦噓輦
金甌而式固調玉燭以恬如民熙熙而道蕩蕩還醇風

於太初奠丕基以凝

帝命垂奕禩而有餘頌曰穆

皇風兮化均調四氣兮以淳和而能至今物靡不親聖
時若兮福物與民周八極兮浩無垠

皇清文頴卷三十九

欽定四庫全書

皇清文頴卷四十

賦

璿璣玉衡賦

有序

葉方藹

夫乾苞闡祕襲氣母於羲皇神策迎長占斗綱於
軒后南正司天之載五緯同躔東嵎迓日之年四
時成歲乃肇渾天之制爰垂歷象之名邈矣悠哉
邇乎尚矣若其靈承帝眷敬授民時基命夙夜之

心效法聰明之德先聖後聖其揆一也我

皇上凝休貳極昭受璇穹上治而協健行下交以成泰
運珍符霧集聚房會井之精景貺雲臻合璧編珠
之瑞猶且單心不懈奉若加虔推玉律以調八風
授靈臺而占五候星球乍啟不踰分至之司圭表
初懸無爽陰陽之景緹宮吹管即應黃鐘嶰谷鳴
簫奚煩黑黍此惟清寧同撰日月合明故仰昊瞻
天久在淵衷已裕勅幾觀象不越反躬而求矣若

稽勲華之代首崇平秩之規是有璣衡用資測驗
以之考憲而七政攸齊以之亮工而五辰斯撫固
稱隆於曩昔實合契於今茲敢竭疎庸敬陳斯賦
天德健行

聖躬時憲懸象昭回泰階巍煥並明照以升恒握神機
而清晏攬貞觀之同符羨勲華之再見審厯象之儀型
考璣衡之舊撰爾其乾文中列坤質外包機緘畢設網
紐斜交既轄之以圓軸又筦之以橫簫飾螭珠之的皪

琢崑玉之英瑤輸激水以自運旋靈樞而不撓三重之儀而六合莫之外一寸之管而萬象不能清其為體也規如彈丸其為用也捷如轉圜其為象也三百六十有五度之廣其為數也一百七萬一千里之寬黃道赤道界其內南極北極持其端日月迴環於其際星辰縈帶於其間東游而蒼龍晨駕西游而玉露宵溥景長而朱曦送燠景短而清風戒寒辨早晚之異候察盈縮之殊觀雖渾涵於一氣實森布於周垣智非同於窺牖情寧

等於扣槃彼夫洛下初摹鮮于爰度測靈憲於張衡營
銅儀於錢樂承天淳風之改造一行郭公之制作莫不
研渺慮於毫釐覃巧思於冥漠法加密於前人理終資
於先覺縱能析夫天象之至微猶未喻乎

聖心之所託也蓋璿璣之所紀者名玉衡之所窺者形
形非道之妙名非理之精道則剛健而中正理則元亨
而利貞是天體之所以宰乎化育而至德之所以合乎
穆清故乃上瞻峻極仰則高明旁規二曜疏觀列星占

以五事驗以庶徵以言乎日太陽之精純離之質聖人法之以施剛德負丹扆以答陽臨彤軒而辨色洞萬物於幽遐統羣工而祖識煥昭明乎四方布暉光於九域以言乎月內政之修陰教之協聖人法之以安柔節循晏晦以有時慎糾虔而罔忒致少采以修刑謹後宮而辨列起風化於闕雎絕燕私於女謁至夫五緯行天日月之餘彼遲留而伏匿即消息與盈虛雖疾徐之各異及次舍之懸殊要觀祲而禳災必修德以臨諸惟歲星

之為木主東方之甲乙年浹辰而一終揆進退而罕失
適春陽之始舒聿體仁而播德發倉廩以振乏絕飭田
事而定準直睇東作以覲土膏待下流而承大澤熒惑
司火其日丙丁周天行以二載主夏令之暢盈乃有遂
良贊俊之典勞民勸相之行斷薄青而出輕繫嗜欲靜
而晏陰成養壯佼以順時定心氣而永寧若填星之位
乎中央其日戊己而寄王乎季久居之國福厚薄焉者
反是所以統四時而合度總五行而成位會陰陽風雨

之和收稼穡作甘之利節火耕水耨之勤紓金毀木饑之弊爰有太白之曜庚辛是主歲一周天附日而處惟金行之秋令肅天地於區宇詰暴而來遠方勅法而繕圉圉建都邑以備困倉易闕市以柔商旅辰星水德壬癸司衡環陽麗日至陰之精乃迎寒於北郊時閉塞而冬成爰恤羽林之孤寡審龜策之吉凶命百官而眡蓋藏考工師而按度程是曰三辰亦名七政惟在下者召其和乃在上者彰其應匪天心之偶違從實人事之多

逆順皇皇乎不聞亦式穆穆乎非言而令必敬凜夫旦
明若儼承其提命斯軌順而階平庶璣明而衡正為象
緯之貞符昭皇王之景運非甘石之能窺詎羲和之足
問繫我

上聖端拱垂旒倣天體之廣覆嚮明堂而燭幽喜怒哀形
乎寒燠刑賞協乎春秋貌言視聽以咸飭工虞水火之
交修肖乾坤易簡之易演皇極斂錫之疇是故天不愛
夫寶道神永獻以嘉庥德有動而必叶感無美而勿道

定永年之歷數荷帝錫之共球眺榮光於德水產藁莢
於

皇州受昭華龍叙之器賡卿雲復旦之謳婉陶唐之茂
烈方虞后之徽猷又何假乎玉儀銅渾之製與夫保章
馮相之儔

璿璣玉衡賦

張玉書

仰乾象之昭融周寰宇而默運成歲功於靈樞燭人事
以垂訓遐覽古初陰陽軌順五精呈符三光明潤誕受
圖於滎河爰協筭於時令嗣在高陽八風叶應載洎帝
嚳五官司正中星辨於伊耆七曜齊於帝舜於稽虞制
曰璣曰衡璣設象以環映衡窺機而中橫睠密緯之衆
列雖銖黍之畢程飾夜光以測度既規圓而體精琢良
玉以為管亦外澤而中瑩古厯云亡星官失術越有渾

儀是纂是述準尺寸以經營傳璣衡之髣髴其為體也
六合外圍辰游內設指二軸以直距燭低昂於毫末其
為用也分天脊以立極跨地平而定隅持南北之兩端
激機輪如轉樞若夫日躔黃道與赤為界半入其中半
出其外晷長至而牽牛是經景短至而東井斯在辨婁
角於春秋實二分之交會此日行之軌陽舒而陰殺者
也月行九道黃道則一周列四維隨方易色經其南為
朱經其西為白經其東為青經其北為黑分內外而錯

居并中道為九則此月行之軌陽消而陰息者也至於
驗五緯之凌厯兮羸縮於步履惟金水之附日常一歲
而周天火再歲而秉令木一終而司權填中央以主福
閱二十八歲而一遷其間順逆留伏循環無端伏行最
急留行則延順厯而東行則合逆軌而西行則偏此五
星之度有常道亦有變愆者也大抵日月之行以天為
輻星緯之道以日為轂天左旋而常羸日麗天而差縮
天視日為有餘日規天為不足積經歲以為期斯日會

天而來復繫太陰之行緩按躔次而可推計一日之所
退常十三度而有奇月一周而交會實日速而月遲惟
星官之步歷謂進度為難稽指逆數以握算若右旋其
易窺倘折衷於至當實左旋其不移夫天度有常觀象
斯在天命難諶惟德克配昔者聖人之答幽明序五行
也畫考乎日氣協純陽象以修政積精於剛垂離照於
庶事振遐覽於八荒夕考乎月體含純陰象以修德退
密洗心既內庭之式序亦宵衣之是箴爾乃啓春令於

東陸屬重華而為木溥仁澤以噓枯配青陽之覆育秩
夏令於南訛屬熒惑而為火敷禮教以牖民範羣蒙之
偏頗涼風既至太白司金象秋令以義正肆賞善而罰
淫嚴霜乍隕辰星司水象冬令以智臨爰植綱而置紀
令行季夏中德為土四星迭運填不易矩堅大信如金
石捷令申於風雨於是乎有治溝洫設陂防疏川谷謹
關梁之水政有司烜燿頒禁律改國火救時疾之火政
有戢淫邪嚴五刑誅暴慢厲五兵之金政有掌薪蒸禁

林麓司器用慎儲蓄之木政有辨物產課樹藝定土主
度地勢之土政凡以觀文察變協序撫辰或灾沴之偶
告即修救以薦馨雖禮詳於三代實道啟於虞廷觀於
命九官分庶職倣天工協羣力罔非察惠逆於神人相
璣衡而因革此所謂欽若之淵源歷千聖而同德也天
祚

聖皇丕膺休命衍箕疇行夏正格神明盡物性握苞符
以建極召箕畢而環應惟

睿慮之璣衡不假器而垂鏡於時天門肅穆泰階清平
儼衆星環共而仰紫極之威神焉百職受成四海陶冶
譬二十八宿之森列而司九州之分野焉朝視政以勤
民夜考經而省憲兩曜之旁矚無垠而宰之以至健也
軫旱潦以渙號宣幽滯而達情五緯之代更遞旺而總
之以好生也繼自今以協氣旁流嘉生蕃殖大澤沾濡
聲靈允塞固不必連珠合璧之祥五福庶徵之集然後
知邽隆臻於三五而天人接於呼吸也已

璿璣玉衡賦

王鴻緒

維天運之無垠仰蒼蒼於終古秉乾健以立德普覆幬
於六宇殫智慮而難窺藉法天之聖主粵稽軒轅受命
披圖作觀大撓占斗綱隸首立算數容成作蓋天臾蒞
推英部羗星官之羅列順四時而步天武傳自陶唐彤
車白馬爰造璣衡分經準舍欽若勿違授時函夏揖讓
有虞祇承玉歷仰觀俯察朝乾夕惕碧漢高低星辰的
皦目營心維斯程是適爾其為璣也如輪如轂象天之

圓繽紛合沓
星布星躔煌煌煜煜
璀璨編連
擎夜光之徑寸綴瓊宇之澄鮮
爾其為衡也取質荆山是琢是雕
中空外堅
美麗瓊瑤似截瑯玕之竹如橫鳳閣之簫
用以斜窺夫列宿睨視乎層霄
至南極北極作天樞紐出地入地或昂或否
衆星分羅如臣拱后天穹窿而旋左
日月星辰錯落而旋右
總度數之勢如皆於是焉觀其
休咎若夫曜靈東浴玉兔西生
拂扶桑而沈細柳揚素娥而瀉銀瀛
一則乍贏乍縮一則半虧半盈時而重光

重潤時而或犯或凌苟按器以潛思洵燭照而有徵廼
熒惑處南重華居東太白西而辰星北填為土德宅乎
其中既稟性之各異亦徐疾之不同月陰精而具陽日
陽精而秉陰金水受光於火日木土資生於水金他若
羣星之隱見盈萬羅寥廓而森森無不挈靈機而知數
倚玉管而探尋於考中星實辨昏曉秋虛冬昂夏火春
鳥譬循環之無端猶翔龍之旋繞定四序於代更割陰
陽於忽杪至稽行道之黃赤分內陰與外陽蟾魄之青

朱黑白義御之冬短夏長一南而百物彫朽一北而萬
彙輝煌等瑤梭之交織僚七襄而成章皆璣衡之妙用
察天道於微茫何三代永守以為寶遭函闕一炬而消
亡迨經營始於洛下鑄象肇於壽昌錢樂造為銅渾倚
尺度而寸量更若儀名六合制起三辰側立斜倚分其
位黃環白環運其輪儼四游之在內準直距而維均恃
衡管之俯仰占晷刻於冬春洎仰儀簡儀之迭變候極
立運之紛綸師古帝之遺法曠千載而同論苟厥德其

不回何妨乎創制之維新我

皇上文武聖神誕膺景命體天行而作則順民時而立
政合二氣以相宣調萬年之金鏡念乾符下孚於君德
必

皇衷上契乎穆清故前民而開務謹時憲於元正離光
騰而物照冰輪現而景澄則

宸躬之日月常升恒也視為目而主明貌為水而主恭
聽為金而主聰思為土而主睿言為火而主從則君心

之五行恒肅雍也無形之七政運行罔息在中之璣衡
不聞亦式雖上極夫皇王之盛治疇得以絜崔巍之至
德將使日月循緯五星同色比重華之遊河八昂同放
勲之睹景出翼相與游乎卿雲之縵縵暢九垓而彌萬
國

璿璣玉衡賦

有序

湯斌

臣聞蓂莢初生古帝識明時之義澤火成象大易垂治歷之文朝廷之政令未施奉若之儀規先備蓋敬天即勤民之本而法天實凝命之原自容成定握算而六術已昭黃帝聽合宮而五行較著南正司天北正司地重黎釐職於陰陽暘谷候春昧谷候秋羲和致嚴於分至莫不仰觀俯察上律旁羅然存其理而缺其儀未盡觀占之哲有其數而

無其器難成察稽之功尚考虞書聿垂偉製踰度
窺於寸管文星運於圜機聚山澤之精華極人工
之賁飾誠授時之要術步歷之宏規也然而至德
難聞成模漸斲精思罕遇不無章會之訛參驗或
淆遂有統元之悞以建申為建亥魯人之月令無
憑以食卯併食辰齊廷之度數何舛太初歷稱邃
密壽王猶議其非乾象術號精深韓翊尚指其短
固由天行之難定實亦制度之未精觀會通於古

今應彰明於

昭代恭惟

皇上履端建極麗正凝神日就月將光華協于天地朝
乾夕惕奮迅象乎風雷道在欽崇凜曰明而曰旦
功深宥密謹亦保而亦臨時憲之厯久頌永年之
法新勒合元會運世之終始辨五十二家之殘叢
將見合璧聯珠歲書太史大章含譽日紀靈臺乃
復尚稽典謨究明遺憲旁招庶士敷奏鴻詞將假

翰藻而明三才藉筆泉而協五紀臣罔窺理數素
昧天人幸際昌辰敢辭蕪陋謹獻賦曰

緬鴻蒙之初闢邈莫知其紀極仰寥廓而無垠識蒼蒼
之正色渺終古而左旋疇轉輪而不息羅萬象於周廻
建極紐於南北三垣表內外之宮庭列宿畫中原之邦
域園九重兮誰營里九萬兮孰測維邃古之神靈肇觀
天而作則揆茫茫之元化總睿聖之範圍粵重華之膺
錄紹放勲之巍巍初受終於文祖乃躬覽夫萬幾方類

裡之未舉首申命於衡璣蓋執中以體會於淵穆自觀
察而效法其精微亦猶七十載之光被四表其功用惟
本天治人而不違若夫魁衡招搖之密運陰陽寒暑之
潛移非參稽之不爽何庶績之咸熙矧乃天雞曉唱羲
馭晝跋朝浴滄海夕耀崑崙崙景近極而炎暑景遠極而
易昏居牽牛而一陽來復舍降婁而春風自溫燭龍未
足誇其光彩夸父無由效其駿奔至夫繼離宵曜夜光
融融朐眇警闕眊魄示冲應潮汐之消長從箕畢而澤

風日退度於十三遂置閏而成功再如木德行仁太白
秉義熒惑主禮辰緯藏智惟填司信位王四季或期歲
而周天或累年而遷次或方進而復留或既分而忽會
信薄蝕之有常乃伏見之難泥初偶乖於繫黍久漸易
其機樞何以測算不失於晦朔氣數罔愆於盈虛惟至
人德合蒼昊制準乾圖璣運外而規園衡當軸而虛中
兩極相望於直距九行環繞夫紫宮大梁實沈之周列
鶉首鶉尾之麗空西游兩環定經緯表裏之準三辰六

合挈卯酉子午之針運躔離於晷刻轉造化於尺尋東
作南訛畢協於節序攝提孟陬宛肖夫天心隨波降升
似昭回之銀漢與日環繞象靈烏之迅飛晝晦重陰而
儀度不愆烈風雷雨而僭忒不譏飾以鴻寶綴以美璣
瓊壁精瑩雲霞之色可挹夜光璀璨星宿之芒依稀雖
曰以管窺天何能持小而測大要之因衡察象實可殊
途而同歸後若萇弘子韋之探蹟索隱梓慎裨竈之極
渺窮工殷周之巫咸史佚魏齊之石氏甘公王朔唐昧

之觀星候氣尹臯吳範之視日覘風漢唐則壽昌一行
之術密宋元則沈括守敬之業崇其用器也踵事而增
華敷衍而不窮或造輪扇而刻木或倚渾儀而鑄銅或
削蓮花以傳箭或斲觚稜以盤龍誰能不祖奧旨而述
成規遂可察氣數而合蒼穹豈若倚蓋彈丸蟻旋磨轉
術家之微渺無聞法象之探索猶淺彼張衡之藻翰稱
工洛下之經畫推善靈憲之圖書猶存歲差之考稽難
舛損益適宜縮贏合撰足以驗同氣於天人通至誠於

幽顯是以帝王俯察人事仰觀天則時幾必勅視聽毋
惑常扶陽而抑陰更緩刑而尚德雨暘寒燠若其序歲
月日星順其職皇猷玉潤而東壁聯輝帝典金清而左
角不忒煌煌乎執大象而撫地中面稽天若卜年萬億
敬抽毫而作賦若身隨臯夔之班而遊唐虞之世

璿璣玉衡賦

梅文鼎

至哉渾儀之為器也體天地之撰類經緯之情極深窮
高闡微致精殆更僕莫殫其蘊累牘難悉其形者矣粵
自道生宇宙肇為大圜健運無息東西幹旋七政錯行
宿離糾紛交光羅絡終始相嬗雖有離朱孰闕其端聖
哲挺生繼天立極開物成務叙疇作易俛眎仰觀躋探
隱索諗六虛之曠邈詎目營兮可獲廼範金兮為儀縱
若衡兮八尺厯以之治兮象以之覈堯命羲和四隅分

宅制閏成歲釐工熙績匪有器以御之孰所憑而推策
虞帝受之璣衡以設敬天勤民兩聖一轍嗣三統兮迭
更茲重器兮罔褻陳東序兮天球惟河圖兮為列蓋先
聖之法物豈司天之可闕羸秦力政蔑棄天常遷周九
鼎焚燬舊章球圖湮沒莫知其鄉歷紀乖次伏陰愆陽
及夫漢造太初渾天初置惟意匠兮經營莫詳徵乎昔
制曾黃赤兮未分矧歲差兮能治歷唐逾宋代有討論
小異大同踵事增新說存諸史約畧可陳外周六合八

觚三輪平圓象地以域昏晨子午雙環樞紐中尊卯酉
交加日月之門是立郭郭以挈三辰黃倚赤而相結剖
二至與二分判發斂兮南北距紘極兮為言小環四海
又居其內左右周闕兩簫更代低昂斜側折旋唯意儀
三重兮共樞亶推步兮精義亦有銅球實惟渾象列星
綴離三家殊狀或附益之兩曜類蟻行兮磨上遲速行
兮一機或水轉兮磨盪非不研精覃思窮神盡智象重
大兮易膠每機關兮弗利儀重環兮掩映或未宜兮窺

視加以代易人湮乍成旋廢造之也綦難用之也匪易
若乃元祖初服廣徵碩儒有美魯齋王郭之徒既作授
時備器與書高表四丈承以景符簡儀候極離立扶疎
二綫代管分秒乘除度百刻兮天腹旋立運兮四虛闕
几兮測月蓮花兮挈壺正方有案兮定南北懸正坐正
兮九服之須仰儀兮虛而似金度斜絡兮南極攸居可
謂酌古準今洵美且都者矣歷年逾百有明膺命雖大
統兮殊稱實授時兮為政屬作都兮石城旋京邑兮北

定既觀臺兮屢遷地更寘兮乖應豈儀器兮多迂抑疇
人兮弗敬寧弗善厥初兮歲薦更兮滋病經生既非所
習兮又圉之以禁令占測算各分科兮或承謠而罕正
設官司厯幾為文具交食或乖誰知其故爾乃海西之
士萬里來賓奉其師說備其諮詢如禮失兮求野似問
郊兮識官實闇符兮周髀此久缺兮彼傳於是吳淞太
史仁和水部夜譚晨鈔心追手步亦得請而開局集歐
邏與儒素擷西土兮精英入中算兮鑪鑄屢清臺兮襍

候多密合兮可據牀巧拙兮相形新術良兮羣妬歷既
成兮弗用書十年兮徒著何人事兮多違或有待兮天
意茲遇隆時體乾出治頒朔正時上符古帝洞新法之
合天可永遵為定制既測驗之無差豈中西之有異哂
陋儒兮泥古騁小辨兮譏評若盲不杖兮聾別竽笙斯
術之無弊兮經指摘兮益明乃詔大史乃咨在廷謂新
歷兮允臧顧儀器兮未成式采銅兮名山鳩哲匠兮上
京備製兮六儀各錫兮嘉名赤道兮法動天之西轉黃

道兮順七曜之東行古二道為一器兮聊彷彿其斜橫
今別其用兮法以簡而倍精黃既麗赤而左旋兮復右
還以計程緯度之各異兮亦異其經黃自有極以運兮
測距度以為微日心正對兮遊表是承時時可驗節候
兮若響於聲地平之儀辨方正位轉綫參直三光所至
出沒之度漸升之意秒忽微茫具可別識象限平轉兮
測高與庠割圓八線兮於是焉施合四為一兮周天在
茲度惟九十兮厥數已全紀限六十兮於以參焉正反

隅角兮靡幽弗宣用稽距度兮兩星之間弧三角之法
兮推其所然五者相資多人兮測片晷之餘各盡目力
假變行之迅速蓋須臾之罔忒別有渾球全賦星躔循
黃之極碁罫珠聯列曜遠近南北八度小輪之限準斯
無悟亦依赤極出地有恒或正升兮斜降或正降兮斜
升晰伏見之先後信里差之足憑黃緯之列兮百世無
改宮兮迤差兮恒星東匯以度計年兮六十六載下設
旋輪兮應時周動刻漏罔僭兮機發於踵爰有高弧繫

之天頂地平經緯相為形影或象限兮平觀或紀限兮
斜距或黃赤儀之所窺絜之球而參遇爛若軒轅之寶
鏡兮縮圜形而周布衆儀得其散兮球徵其聚正求兮
反映宛轉兮迴互測量有書兮或不能句摩挲斯器兮
曠如揭霧更旋宮兮十二隨道里兮攸殊際地之極南
北兮以為之樞子午及平環兮以限四隅隅各三宮兮
東方為初次第右環兮大權以區三合六合之照兮凶
吉兮途惟斯球而可睹兮考步筭之密疏致用萬端未

克枚舉洵天府兮奇珍昭大法兮來許若其鎔金有術
棄滓取精磨礱砥礪光輝熒熒旋之中規直之中繩擘
劃勻細大半畸零重心巧測銖兩無贏惟真儀兮合度
雖久遠兮無傾趺交之以銅龍兮或海獸以相擎為水
準與螺柱兮常消息焉取平天矯兮騰蹕攫拏兮猗猗
詎美觀兮一時永奠定兮千齡乃至崇臺百步迴出闌
闌周以儲胥纖埃不至上列六臺方圓式異相依兮交
讓旋觀兮罔闕施窺筒之奇巧盼千里兮如對晝候兮

日面之星夜占兮句已之態折照浮光兮氣水水氣清
濛厚薄兮地心相配交食淺深兮起虧進退地景厚薄
兮青綠明昧視差有多少兮命天九重月有弦望兮太
白攸同抱日為輪兮互入相容超西法之舊兮信天能
之弗窮登斯臺也軒豁洞達耳目開通揮斥兮八極廣
攬兮無終意氣兮飛揚凌虛兮御風習其器也陸離滿
灑繽紛容與爛漫兮卿雲昭回兮星野照曜兮焜煌周
流兮軒翥懼臨汝兮旦明遊吾心兮太古帝載之於穆

兮陟降其所垓埏之遼絕兮斂之一忝匪重黎之遺迹
兮曷其臻茲要眇邈邇祁姚之不作兮疇復探斯奧窔伊
崇效而卑法兮協至德於太灝定百代之猶豫兮踵惟
精於帝道畢遠臣之巧思兮備前王之所少璿璣玉衡
之不傳兮乃今而獲聖人之大寶亂曰巍巍穹窿帝所
則兮小心昭事惟合德兮寫以良金如肖像兮父乾母
坤斯瞻仰兮予之於親視無形兮對越在茲曷敢以寧
兮兢兢業業承天休兮奉若不違升大猷兮祈天永命

從茲始兮億萬斯年昊天其子之兮

瀛臺賦

葉方藹

惟

皇清受命混一海寓建邦設都開疆啟土煥紫宮之喬
皇輝丹闕之耀麗五雲鬱其上浮九重屹其雄峙固已
運中央設萬國奠六龍翠四極樹無外之宏模立不騫
之遐則者矣爾廼

皇上聽政之暇思以

睿情洽

宸歡頌匪日咏斯千爰循故國之遺址聿起

新朝之壯觀歸乎其所謂瀛臺者是臺也聳金墉之西
隅環玉河之四匯矗鴻濛而建標映觚稜而交彩俯雲
霧以檻楯捫星辰以戶根廓遐覽於九州迓景福於千
載寧良工之役其鬼神直上宰之移其蓬海觀夫紫祀
霏微碧基深窅層櫨揭葉飛梁夭矯陽馬驤騰於四榮
陰虬躡跂於八表芝栴煥其戢晉桂柱挺而踔躑爛朱
綠之璘璘續仙靈之縹緲金黿玉螭連閣道以紆迴雕

碧文珉緣御墀而窈窕中復藏溫室理曲房蘭牖藻井
螭栒鳳牕瓊寮珠戶玉陛瑤璫青瑯歲蕤夫綺疏丹雘
歛艷乎雕梁既宮我而雲竊亦蜿蜒而軒翔瞻矚周旁
俯仰上下其翼然者為亭其曠然者為榭其幽然者為
淵其呀然者為罇鸞簫象管奏

天樂於芳朝雲錦霓裳奉

宸游於清夜山則林麓深窳岡巒參差嶮巖岵嶢峴
鬼嶷玉女捧盃而上晚仙人引掌而下垂湧寶地而傑

立非神變其誰為水則發源西山沂流渤海汎濫洄瀾
砰礚奔駭走碧沙以汨汨激白石其磊磊似弱水之蕩
滴乎神居望瓊樓珠閣而靈黠則有珍樹敷榮瑤草含
秀迷穀洊開華平長茂肅慎貢夫雒常拘彌獻其變畫
紛沓蒼鬱左右前後畜九真之祥麟圉林氏之駟虞馴
條峯之蒼鹿閑大宛之赤駒鴻鵠鸛鷺互頡頏於霄漢
鵷鵠鴻鵠爭唼啜於菰蒲青條裔與而遂其羣育白魚
跳躍而應其貞符時維春也勾芒司令太皞秉權萬木

紛其向榮百彙呈而鬪妍條風披拂淑氣回旋

天子於是御蒼玉之輦載青帛之旃望蓬筐於桑野省
錢鏹於農田禩菁華以敷賁達幽滯而昭宣或賞花而
作賦或垂釣而搞篇時維夏也長羸序臨祝融炎煽平
疇麥登凌室冰薦羨嘉木之留陰賞芳蓮之發綯

天子於是彈五弦之琴揮七華之扇驅浮塏於太空引
神飈於綺殿既解愠而阜財亦覽時而察變豈繡嶺之
能方而甘泉之可羨若夫白帝改候青女戒時百物告

瑞萬寶薦釐

天子乃復出重雷降層墀驂大丙擁羣祇講獮狩之典
習戰陣之儀八旗雷動七校雲移曜霆掣電搏熊射羆
弧彎而蒼隼落劍舞而白猿馳凡以順金令之肅殺而
代造物之威施至於北陸迎暉南方見昴虹影既藏雲
物斯考

天子乃復扃神紘微棲心元顓爰燕息而深居用恭嘿
而思道牙籤錦軸朱文綠字之奇玉匣金縢大貝赤刀

之寶周廬環護夫百靈宥密靜通乎萬肇於戲斯真所謂斟元化順亭毒攬金鏡調玉燭酌兩儀之節宣統億萬於掌握爰窮高而極深自膺福而綏祿故能奢未及侈儉而不陋規遵王度動中得趣構成靈闕結為神宇擬玉虛之清都恍太乙之紫府觀者目眩而精搖聞者神動而色沮斯固侍從之方朔不能馳辨而逞詞待詔之相如毋庸挾藻而抒麗者也爾廼下里之士負書珥筆挾策周京觀光上國躑躅鵷班之後徘徊象魏之側

喟然興曰夫詩書所陳史冊所紀唐堯茅階虞舜蒿柱
混沌淳悶不可久處若夫周有靈臺而興秦以阿房而
廢未央建章臨春結綺神仙長年艮嶽瓊宇或藉之昌
或荒以圯惟居業之不同斯處室之各異今我

皇上端而虛儼而佇高拱九元洞矚萬里咨臯夔訪伊
呂解網縱禽吹律回黍貌言視聽被其思歲月日星符
其序雨暘寒燠四時若其官食貨賓師八政修其紀是
以庶徵應百福綏遠為和風近為朝曦及物物解被人

人怡練太和於神明動歡欣於四支雖一游而一豫亦可咏而可思夫臺之以瀛稱也唐有瀛洲之榮宋有瀛館之選皆以處夫石渠之英而集彼金門之彥顧何草茅末品蓬蒿微賤亦得翱翔碧霄眺瞻清殿繞龍鱗而識

聖顏移雉尾而窺宮扇深荷

高厚之神施敢矢涓滴之微願請為作歌以志舞抃歌曰維

皇有道無反無側維

皇有路蕩平正直

皇在靈囿熙熙長旦景星紛陳卿雲是爛

皇在靈沼澤沛恩浹海水無波江濤有截

皇之出兮百神駿奔雨師灑道風伯清塵

皇之入兮元一守戶以翼以于是篤是祜惟圓錫蓋惟

方獻興惟岳輸固惟溟效濡億萬斯年我

皇樂胥

懋勤殿秋蘭賦有序

葉方藹

臣方藹於七月二十四日入直

南書房臣英臣士奇示臣

懋勤殿秋蘭賦二篇竊念蘭微卉爾得沐

禁近之清光荷

天顏之一笑何其幸也臣又聞十室之邑必有忠信十步之內必有芳草山陬海澨含英孕奇者何限物倘有知欣欣向榮之情曷能已乎於是廣此意而

為賦曰

覽大鈞之播化察卉木之殊類庶土所滋繽紛薈萃或
品下而栽榮或質幽而地頽惟懷芳兮處崇斯揚蕤兮
呈瑞相彼幽蘭精英淑粹當其萌茁於山陂也靈根所
託不高不卑陋下澤之沮洳厭層巖之嶮巖倚翠微之
徑曲緣碧澗之水湄含華吐秀芬敷色披背綠施與資
弱映杜蘅與江蘺夫其抱馥雖殊應候自若冬索春敷
夏茂秋落乃有類同稟異貞姿晚萼勾芒升而絢葉始

抽蓐收御而朱英方折衆皆黃落以萎摧此獨流馨而
綽約貞潔兮似抱德以待時晶英兮類協期而知托依
赤墀入紫閣長結蔭於玉除永棲影於金谷且夫
懋勤之為殿

聖主於是乎寧神端拱怡情典學擷先哲之菁華藻圖
書而丹雘綺疏日上兮鉛槧纍纍櫺檻風來兮芸香漠
漠延載筆之儒臣褰穆清之淵幕於時松牖始秋梧宮
未霜蓮潭變彩竹院生涼蒼苔縈砌瑤草拂廊開琅函

而氣爽抽鳳藻而思颺爾乃綺牕之下綈几之旁翠枝
縹蒂紫莖綠穰天香流兮拂拂幽蘊發兮揚揚至如陽
暉早曙露濯清宵鶴羽初警蛩吟乍撩蚪簷晚靜蛛網
畫寥挹孤芳兮若遠若近玩貞姿兮永夕永朝遇青裳
之薰鬱黜將離之艷妖亭亭兮如謬謬之臣矢冰心以
環列左右纚纚兮如潔修之士敷玉藻以掩映

宸霄彼夫度索之桃實三千扶荔之甘蕉十二陵邱蟬
聯臯澤搖裔者不可勝紀皆擯置而不陳獨此蘭之繞

砌於以見崇質而斥華尚德而賤藝栽培乎素履之林
掇採乎晚成之蒂根深而其膏必沃植厚斯其功弗替
豈無緣山被阿枝叢葉歧怨空谷之莫采經霜霰之淒
其則與麋鹿偕處腐草同萎空寄生於野人之圃或分
蔕於山谷之坻雖烟霞之賞愛奚崇高之見知臣聞去
蕭艾惟虞未盡藝蒲蘭常憂不榮何難羅三湘之秀擘
七澤之英盡九畹之種空百晦之羣上窮嵯峨之顛下
澈清泠之瀆拂之拭之兮咸登

有道聖人之側俾流徽於宣化之闡崇禮之廷而且林
總兮萬品之翦鬱扶疎兮千世之蔥菁

會同館賦

盛符升

若夫風雨之交河山之固帝王所以宅京也車書之會
道里之均遐邇所以來庭也故北鎮始封流沙西被而
東矢既貢駢乘南行惟八荒之在宥斯九譯之咸臻服
紈牛而馴露犬供珠樹而獻素禽以至飛車乘毳沒羽
浮金賁虞周所未賁臣軒頊所未臣莫非太平之盛事
因為一統之常經至於懷方有氏象胥有官治其委積
致其饗殮皆昔王所以崇禮數重郵傳也我

朝肇域東方親附莫先於蒙古自白鶴之夢應於秫田
玉璽之祥收於察部而相率來歸者或義屬一家或恩
周萬戶即今四十九旗之衆奉貢請安者歲時踵武所
以理藩有院特為開府他若賓服之三方則會同館為
之主也原夫共球肇啟東自朝鮮節貢者三年貢者一
其臣事為最先赤瑩朱提比於三品蘭干屬纆擬於絺
織豹獮取織皮之備紙米當穗稭之全而其仰被恩施
者特厚賜金印賜裘馬免鷹免弓減粟減綿所加禮者

已六十年西有吐魯番則回族也地本車師闕通嘉峪
昔爭哈密而構難於前朝今合五城而入貢於甘肅所
進者西馬羚羊金剛玉璞亦有駝鷹蒲萄旃罽刀弓之
屬

朝廷念其荒遠貢為遞減而賞從優渥由粵西而入者
安南黎氏也龍編雄贄數款祥州玉節星軺時臨富水
期兩貢之並進定六年以為紀厥貢南金博爐燭銀縷
簋加以薰陸沈箋犀角象齒因其君臣能慕義以獻功

仰承

宸翰有忠孝保邦之褒義至於粵東之貢道非一其南而西者為暹羅地多犀象俗貴香茶翠毛雀尾紫梗椒花紛織文與白氎兼藥石之繁多其西南之絕遠者為西洋舊有古里鎖里三十餘國散居海疆若今之波而都瓦為前代所未詳數其庭實亦有珊瑚琥珀哆囉伽楠象齒犀角油露諸香後以貢獅復至義更重於來王今其人之向慕華風者多留處巖門之陽而十萬里外


更有異士星歷擅長生在拂覽勞績尤彰其由閩而入
者為東南之琉球也居馬山而依龜嶼歷彭島而入湄
州二年一貢臣職克脩封使再遣禮節殊優復軫念其
地瘠自銅琉海螺而外槩謝却而弗收而中山世土之
題榜

天章炳炳於遐陬兼許其陪臣子弟雍序來遊斯文教
之遠被足司契於懷柔其昔道粵東而今由南閩者為
荷蘭地居險遠貢以八年充庭之盛過於諸邊如珊瑚

琥珀玻璃玳瑁皆珍錯之駢闐及哆囉哩咬洋布矮緞
復紬綺之斑斕雜以刀劍鞍馬檀栴香露番花番氍毹
毼毛氊而海氛未靖之日又能移兵助勦功成夾板之
船所以彤弓載錫嘉其至而勞其還他若西陲之有番
寺乃土番故地也元為郡縣倘尚浮屠明初因之改立
僧寺今之在洮岷者二十六在西寧者九來則各加恩
賜其烏斯藏為稍大或稱王或稱法王或稱國師或稱
禪師厥號各異地由滇蜀以逮秦隴義取外扞而兼內

衛此又効順坤維甘肅以南之屏蔽也方今海水恬波
扶桑銜日商舶環通泉流外溢將銀甕竹杖之咸臻亦
鳳穴麟洲之可陟則又有四譯之館以待殊方之遙集
雖吳客之稱大歸西賓之譚無外安足以罄其頌述哉
臣職次禮官預聞南館有通事以待朝鮮有司賓以通
四遠致饗致餼之俱詳掌環掌訝之是典更有三館二
廠聚其馬馳收之牧苑雖析為有司之職守無一非
聖澤之流行也頌曰環館開卉衽來趾相錯兮玉虎鳴

銀麋入增式廓兮越火枝浮瑤水窮禹鑿兮或冠帶或
椎結紛戍削兮梯航會筐篚陳奇珍爍兮六節通九牢
具恩優渥兮守四裔家六合綿地絡兮東戶啟南薰奏
長宴樂兮



皇清文穎卷四十